

27 DEC 1999

Negara-Mohamed

MOHAMED YAACOB DILANTIK SEMULA YANG DIPERTUA DEWAN NEGARA

KUALA LUMPUR, 27 Dis (Bernama) -- Tan Sri Mohamed Yaacob hari ini dilantik semula sebagai Yang Dipertua Dewan Negara bagi sesi Parlimen ke-10.

Pelantikan Mohamed dicadangkan oleh Perdana Menteri Datuk Seri Dr Mahathir Mohamad dan disokong oleh Menteri Di Jabatan Perdana Menteri Senator Datuk Paduka Dr Abdul Hamid Othman pada persidangan pertama dewan itu di sini.

Cadangan Dr Mahathir itu dibacakan oleh Timbalan Perdana Menteri Datuk Seri Abdullah Ahmad Badawi.

Mohamed, 73, yang telah memegang jawatan itu sejak Disember 1996, dalam ucapan ringkasnya berkata beliau amat berterima kasih atas pelantikannya dan akan cuba menjalankan tugas dengan penuh tanggungjawab.

Beliau turut mengingatkan anggota dewan itu agar menjalankan tugas masing-masing dengan penuh tanggungjawab dan dedikasi demi untuk negara seperti yang diharapkan oleh rakyat.

Anak kelahiran Kelantan dan ayah kepada lima orang anak itu telah menjawat jawatan Yang Dipertua Mahkamah Tengah di Muar, Johor pada 1960 setelah menamatkan pengajian undang-undang di Lincoln's Inn, England dan memperolehi ijazah Barrister-at-Law pada 1958.

Sebagai anggota Kabinet, Mohamed telah memegang jawatan Menteri Pelajaran pada tahun 1973, Menteri Tenaga, Teknologi dan Penyelidikan pada 1974 dan Menteri Perusahaan Awam (1976).

Beliau menjadi Menteri Besar Kelantan dari 1978 hingga 1990.

Persidangan Dewan Negara hari ini juga menyaksikan enam anggota baru mengangkat sumpah sebagai Senator di hadapan Mohamed.

Mereka ialah Abdillah Abdul Rahim dan Benedict Bujang Tembak dari Sarawak, Datuk Karim Ghani (Sabah), Datuk Hazizah Mohd Sultan (Melaka), serta Hassan Shukri dan Safinah Jusoh dari Terengganu.

Mereka akan memegang jawatan bagi tempoh tiga tahun dari tarikh lantikan masing-masing.

Persidangan juga sebulat suara meluluskan Rang Undang-undang Kumpulan Wang Disatukan (Perbelanjaan Masuk Akaun) 1999 tanpa perbahasan bagi membenarkan perbelanjaan untuk sebahagian daripada tahun berakhir 31 Dis 2000 berjumlah RM18.4 bilion yang telah diluluskan di Dewan Rakyat 23 Dis lepas.

-- BERNAMA

NHA NMO